

# BUSINÀ 76°

2000 – 2001

(Panizza Lorenzo – Pittaluga Lorenzo)

Buna sira, buna sira me cari siuri! E bén c'mè c'la va?

L'an pasà as suma facc j'augüri per in bon doimila: per furtëina i j'eru augüri 'd bon ani, figürumsi se i fissu nént stacc augüri!

U doimila u m'ha purtà u teremot e pensè ch'i m'hòn semper dicc che u sareiva mai capità, perchè a suta u noster territori a j'uma ammach 'd la sabia; pó' l'aluvion an mesa Italia, e noi a na suma cuc cosa! Adès basta ch'el pióva doi dì che i fiüm i sòrtu fora.

A Lisòndria, per nént esi da menu, basta ch'i pióvu du stisi d'acqua, ch'i saru el pont ad Tani. I son sent'ani c'l'è semper lé e u s'è mai bugià e adès i j'hòn tücc 'sti proverbi! Me um smeja ch'i fasu du tüt per trèl zü e chi ch'el va da mèa a suma semper noi, che per andè a Sòn Miché um tuca pasè da Valensa.

A pruposit ad trafic: an tüt el mond i custruisu el circunvalasion per andè pü sgagià. Da noi, ev vist se ch'i j'hòn facc dausen al còmp da balon? I j'hòn facc na 'rutonda', acsé quòndi che 't rivi, 't sai nénta chi c'u deva pasè prüma e us furma na coua c'l'a riva fina an sel pont 'd Tani!

Ònche ist ani i j'hòn stendì i fil per il 'filobus illuminato'. E i l'hòn crumpà an Ulònda, perchè an Italia i custavu trop pòc! Pó', vist che 'd sold a n'uma semper tònc, i j'hòn turna facc la festa dl'ùltim dì dl'ani an Piasa Garibaldi. Però ist ani i risparmiu in miliard e novsent milion, perchè i dòn da mangè cui ch'i j'hòn vansà l'an pasà. A pruposit, la 'pista cun il ghiaccio' ch'i duvivu drubè ònche d'istà, i l'hòn nénta facia. El vo dì ch'i la daròn a L'AMIU, l'azienda dl'armenta, acsé i la poru ampieghè c'mé discarica. I j'aurivu fè la pista ant i giarden, ma pòi i j'hòn scuèrt l'acqua couda e is na son ancorcc c'l'è mei andè a sciè an Val d'Austa anveci che andè an sla muntagnóla, perchè almenu là el fa frigg.

A pruposit ad frigg, fè nénta c'mé Batisten, che quòndi c'l'è mort u s'è presentà a Sòn Peder c'l'ha tirà fora u register e l'ha dicc: "Batisten è stato un padre esemplare, un marito fedele, un cittadino modello. Allora può entrare in Paradiso!". E Batisten u dis: "A son d'acordi, però aurisa fè na richiesta. A j'hó semper avì tònta frigg, bütèm ant in post coud!". "Preòcupi nént, an Paradis u s'a sta bén!". Dop cuc dì, Batisten el va da Son Peder e us lamenta c'l'ha frigg". C'um mònda an Purgatori, a son pü dausen al l'Infer e magari u s'a sta mei!". Sòn Peder ui rispond c'us pó nénta, l'è contra u regolamént, ma pó' per gavesli d'ant i pé, ul mònda an

Purgatori. Dop cuc di, u turna da Sòn Peder e ui dis c' l'ha ancora frigg e c'ul lasa andè a l'Infer. Sòn Peder el fa 'n sout an sla cadrega: "C'mé t'at permèti 'd cambiè el dispusision del Padre Etern. 'T ei dventà mat?". Ma a la fen, per cuntenteli, ul monda a l'Infer. Dop ses meis, cuntrulonda u register, el posa l'ogg ansüma Batisten: "Chi sa c'mè c'u sta' A l'hó pü sentì!". El peja l'ascensur, el va a l'Infer, u tambüsa, Lucifero u droba e Sòn Peder ui ciama: "Dim an pò', ses meis fa a t'ava mandà zü Batisten, a l'hó pü sentì, c'mè c'u sta?". U sent na vus dal fond...: "Lucifero, sara 'sa porta ch'el fa frigg!".

Iv na visi che cuc ani fa av diva che an Piasa Sòn Stevu j'avu tacà sü in strision andó c'u j'era scricc 'Santo Stefano Bènedetto, finisci tu il distretto!' perchè l'era dj ani c'u j'era u steccato antur e i travaij j'andavu mai avònti! E bén, Sòn Stevu 'd miracul u n'ha facc doi: i j'hòn finì i travai e i j'hòn facc la piasa nova cun na bèla funtòuna!

Ònche ist'ani a suma amepgnà ant la 'riforma scolastica'. Na vòta us c'mensava cun l'asilu e us finiva cun l'Università. Adès la 'scuola dell'obbligo' l'a düra fina a tròntani, ij ciamu 'istituti omnicomprensivi'. A menu che 't séi in giugadur 'd balon o in presentatur, che at póri andè an qualunque istitüt e it fòn pasè ij elementar an doi ani, el medij an trei meis e a ventising ani it fòn fè l'Università... dla tersa età! Eh, aveij pénsà prüma! El valutasion i fòn cun di 'giudizi' e anlura el pó sucedi che i fanciòt ch'i s'a scambeju el figüreini di Pokemon e di Digimon i risültu amepgnà ant n'atività 'extrascolastiche'. A j'hó sentì du mami ch'i parlavu dla pagéla. "Me fiò el va pitost bén, i j'hòn scricc c'a l'è an pò' 'discontinuo', ma per furtèina l'è abastònsa 'negligente'!". E i libi dla scola... Adès i vòn pü bén cui ch'i sernu i profesur, i devu sèrni i 'politici'. Acse tücc j'ani i duvreisu fè in 'referendum' per sèrni i libi.

Ist ani a j'uma turna la 'mucca pazza'. Parluma nénta di 'transgenici'. S'a stuma nénta atént, im dòn da mòngè el magiustri col güst 'd l'aj e el tumatichi chi sòn ad mandaren! L'è na béla quistion. El problema l'è che 't sai pü che roba mangè: la carn no, el gròn l'è 'd Chernobyl, la verdüra e la früta i son 'transgeniche', l'acqua l'è 'inquinaja', el vén l'è 'avvelenato'. Se c'u bsògna fè per vivi?! Finirruma 'd mangè na pilula rósa al post 'd la pasta-sücia, na pilula vérda per 'secondo' e na suposta per caffè. Certo che quòndi c'a mangiavu pulenta e burgunsola e la duminica pulenta e merlüs, a stavu mei! Sé, perchè el pó ònche capitè c'mé a cul paisòn c' l'ava vent galeini tüti bèli e grasi ch'i becvu ant in pra. Ui pasa ina machina e ui cala zü in siur elegònt, u ciama el paisòn e ui dis: "Se 't ai dai da mòngè a 's galeini, ch'i son 'csì bèli?". "Eh, car el me amis, ai dag di "mangimi chimici". "Ah bravu! Me a son del WWF, te 't sai c'a l'è pruibì? E anlura i son dusentmila liri ad mülta per ogni galeina!". Dop cuc di, ui pasa in'atra

machina, ui cala zü in ater siur e ui ciama al paisòn: "Se 't ai dai da mòngè as galeini ch'i son acsì bèli grasi?". El paisòn uj pénsa an pò' e pó' ui dis: "Tüta roba biologica: gròn, melia, c'um da in amis, roba c'l'a crëss senza 'diserbanti". " Bravu, me a son 'd la Finònsa; el vo dì c'u j'è gnònca na fatura, tüt an neier: in milion 'd mülta per galeina!". Ui pasa in'atra machina, ui cala zü in ater persunagi e ui ciama al paisòn: " Se 't ai dai da mòngè al galeini ch'i son 'csì bèli?". "Me gnénte du tüt, ai dag mila lire au dì, suta a l'ala, e ch'i is ròngiu".

Am smentiava quasi ad divi e ist ani ònche Gilindu u s'è mudernisà. A j'uma bütà sü in 'sito internet', aj l'uma ciamà 'Siras.com'. Us vig na bèla sèsta voia cun dí buton: se 't gnachi el prüm, u 't riva a cà vent chilu 'd siras. Se 't gnachi u sgond, ut riva in calendari cun del bëci bèje biuti. Se t'at sbagli e 't gnachi u ters, ut riva a cà Mafé!

Pòi u j'è il 'grande fratello'. A suma pròpi mat! 'T pòri nént bütè u dì ant u nas, ch'it vigh an tüt el mond. Um smeja d'ési turnà ai temp 'd la DC. Anlura 't parlavi cun la gént e ansèn u la vutava, ma la piava el quorònta per sent, adès 't senti an gir che ansèn ui uarda (*il grande fratello*), ma se 't ciami cuc cosa 'd cui ch'i son là, it disu ònche el culur di causèt.

Adès av dag na nutisia esclusiva... Ònche da noi, i j'hòn bütà el telecameri an tücc i canton, e a cà meja i son diventà tücc mat, figürev che ònche Mafé u s'è bütà an posa per fè la pulenta; Tirsi u gira an midòndi per truvè na murusa, e Narcis per andè a scola el vo la 'nominesion'. Sul che quòndi ch'i j'hòn facc la ripresa dla stala, u j'è amnì fora dal video na spüsa 'd... che i son scapà tücc!

I sei se c'u j'è sucès a Berlusconi? L'era an gir e uarda an pò', ui scapava ònche a lü c'mé tüta l'altra gént. L'entra ant in bar e ui ciama andò chi son i 'servizi'. "In fondo a sinistra". "Per carità, pitost am la fas adòs!".

Eh! U centrosinistra l'è spurtiv! Anveci ad rivè a u traguard cun in bon curidur, i j'hòn facc la 'stafëtta Amato-Rutelli': speruma c'ui casca nént u testimoni.

Eh! La pulitica d'ancò l'è tüt in atr'afari. Aterchè Masini, Garibaldi e Cavour e tücc cui ch'is son facc masè per el so idéi. I j'eru di mat. Adès per fè pulitica ij'idéi i servu nénta, basta esi bèi! Uardè Rutelli, u smeja in atur ad Beautiful. Amato, c'us n'è acort c'a l'era pü u so travaj, u j'è fina amnì la sciatica. Parluma nénta 'd Fini, sempr'abrunsa, us fa fina la 'lampada' per amnì pü neier. E Berlusconi, vist c'l'è nént in giuvu, l'ha pénsa 'd tapisè tüt el strà d'Italia cun el foto dla Prüma Comunion, perchè a l'ava pü tònc cavì an testa. E Bossi: i j'hòn dicc c'l'è nént fotogenico e u j'è meja 'd sperònsi, l'è mei c'u staga citu, e anlura i l'hòn mandà an sel Monviso a piè l'acqua del Po.

Ma an America el President u j'è o no? 'Sti fenomeni dj americòn i j'hòn

propri facc na bèla figura. I j'hòn bütà trei meis per cüntè i vut e i sòn nént ancora se i cönt i son giüsti. Noi per cüntè el noster crus ai bütuma doi dì, e an trei meis a suma bon a fè quater guvern. E pó' ij americòn i son bon a dì c'a suma la répubblica del banani.

A j'hó savì che ònche an paradìs u j'è di prublema. I sònt is son lamentà col Padreterno perchè u j'è an gir tonta gént cun del faci che i vòn nént bén gnòncia per l'infer. Anlura u Signur a l'ha ciamà Sòn Peder e u dis: "Ma 't cuntroli o no chi c'u j'entra da noi? T'ai ciami o no i documént a cui ch'i rivu adès?". Sòn Peder u ruspond: " Signur, me a fas el me travaj da ot uri a mesdì e da doi bòt a ses uri! Poi a sar tüt a ciav. Però Signur, a pós fè gnénte se, quòndi c'a vag a drumì, to mama la va a drubì al fnestri!".

Ist'ani poi u j'è ònche u Giubileo. Quònta gént c'l'è andacia a Ruma! El pover Papa l'ha duvì travaìè c'mé na bestia. L'ha duvì ancuntrè milion ad personni. Però u Giubileo pü bèl l'è stacc cul cun i giuvu. In milion ad fanciòt da tüt el mond: i j'hòn sunà, pregà per doi dì e u j'è suces gnénte. Aterchè cui quat cucu che per na parteia al balon i sciapu tüt e is dòn del bòti.

Ma prüma 'd conclüdi, a voi ricurdè Padre Alessandro (*Goretta*) c'l'ha finì la so mission an sla tera e l'ha lasà in sign ant el persouni che i j'hòn frequentà l'Asuciasion. L'è stacc ventitrei ani setà an s'in scagnèt a drera al quinti a vighi Gilindu e us divertiva c'mè na masnà. Adès l'è an Paradìs ch'el prega per noi e u da na mòn per tücc i noster prublema.

Adès però a la piònt lé e av present la me famija...